

宋

會

要

全唐文

宋會要

卷四

元祐四年正月十二日詔正議大夫竇文開直學士權
刑部尚書謝景溫別與差違以右正言劉安世言尚書
位執政建官已來吏戶之外它曹多不立置今創為新
意特設權官必將援引資賤望輕之人景溫昨治開封
無狀崇信妖人目為聖母以婢妻子為左右吏至員勢
醉歐人景溫釋而不問今不因省部闕官忽有不次之
舉公議不允故有是命 五月甲八日新除部官員外
郎李德裕依舊校書郎以右司諫吳安詩言在宗正司
憑藉王安石氣馭後為王珪耳目故有是命 十二日

侍御史新除太常少卿盛陶知汝州殿中侍御史翟思
通判宣州監察御史趙挺之通判徐州王彭年通判廬
州先是吳處厚繳進蔡確車蓋亭詩而右司諫吳安詩
右正言劉安世左諫議大夫梁燾復指摘思鄒觀山反
滄海楊塵語劇論確忍悖既詔確具析燾等攻之如初
時陶因言確自引而去豈不知幸後以弟碩犯法降知
安州是朝廷常典確不應有恨使確無心於言偶涉疑
似人雖注釋近於捃摭使言而有意終不能強自為辭
事關君親臣子難於輕議欲乞因其詩之言以觀其心
據所引之事以考其迹苟涉譏刺何憚不誅其告言之
人亦願詳酌處分安世又論陶居風憲之地曾不糾劾

雖備禮一言又是非紛錯皆無定論程思以下仍無章
疏於是陶等被黜 十八日蔡確責授英州別駕新州
安置仍詔給遞馬發遣丁憂人前朝奉郎直龍圖閣邢
恕候服闋日落直龍圖閣降授承議郎添差監永州在
城監倉兼管酒稅務以正言劉安世言蔡確張惇黃履
邢恕四人者在元豐之末相與交結號為死黨惇確執
政倡之於內履為中丞與其僚屬和之於外恕立其間
往往傳送天下之事在其掌握公然朋比旁若無人以
至先帝厭代聖上嗣統四人者以謂有定策之功眩惑
中外無敢與辨及司馬光被用姦人懼為已害乃使惇
於上前極口抵毀陛下以惇無人臣之禮遂之於外確

又以弟碩職汚事發亦罷宰相履恕坐事相繼外補臣雖踈遠不知先帝傳位之詳然縉紳士大夫之間亦嘗講聞其畧今試條析為陛下言之臣聞元豐七年秋宴之辰今上皇帝出見群臣都下喧傳以謂盛事明年三月神考晏駕衆謂前日之出已示與子之意其事一也自先帝違豫岐嘉二王日詣寢殿候問起居及疾勢稍增太皇太后即時面諭並令還宮非有宣召不得輒入有以見聖心無私保佑慎重其事二也建儲之際大臣未嘗啟沃太皇太后內出皇帝為神考祈福手書佛經宣示執政稱美仁考總發於天性遂令草詔誕告外廷盖事已先定不假外助其事三也陛下聽政之初首建

親賢之宅纔告畢功二王即日遷就外第天下之人莫
不服陛下之聖明深得遠嫌之理其事四也臣之所聞
大畧如此竇太皇太后聖慮深遠為宗廟社稷無窮之
計彼四人者乃敢貪天之功以為己力臣雖愚陋心常
疾之近司馬康赴闕邢恕邀至河陽燕語之次稱贊確
等不已蹟其微意類皆押闕蓋欲康來京師傳送在位
陰與確等謀為復用之計臣恐歲月浸久邪說得行離
間兩宮有傷慈孝則確輩萬死何補於事伏望陛下起
福於無形防患於未兆明詔執政及當時受遺之臣同
以親見策立今上事迹作為金縢之書藏之禁中又以
其事之本末著之實錄然後明言正四凶之罪布告天

下除蔡確近已貶竄外所有章惇黃履邢恕欲乞並行
廢斥併之遠方終身不齒所貴姦謀弭息他日無患時
御史中丞傅堯俞左諫議大夫梁燾右司諫吳安詩侍
御史朱光庭右諫議大夫范祖禹亦相繼論故有是命
數日後太皇太后御延和殿宣諭三省曰確罪前後不
一以先朝舊相因其自請備朝廷禮數令其外任輒懷
怨望自謂有定策大功意欲他日復來妄說事端眩惑
皇帝以為身謀皇帝是神宗長子繼父業其分當然昨
神宗服藥既久曾因宰執等對時吾嘗以皇帝寫佛經
宣示其時衆中止是首相王珪因奏延安郡王當為皇
太子餘人無語安燾其時悉見確有何策立功勞若是

確他日復來欺罔上下豈不為朝廷之害恐皇帝制御
此人不得所以不避姦邪之怨因其自敗如此行遣為
社稷也。大防等奏曰：「昨者建儲一事當時衆臣寮僉書
所批聖旨月日次序事理甚備文字盡在中書兼已關
實錄院編記分明。小人乃欲變亂事實輒生姦謀以圖
異日微倖之利。今來又非朝廷尋事行遣自是確怨憤
不遜譏訕君親公議所不容。臺諫二十餘章陛下方行
之命下之日咸知朝廷有典刑也。」十九日中書舍人
彭汝礪可依前朝奉郎知徐州先是蔡確被黜盛陶等
議不同亦黜之。汝礪封還詞頭故有是命。二十四日
知虢州蒲宗孟特落資政殿學士宗孟守鄆失職寃獄

有聞也 二十六日龍圖閣待制知瀛州蔡京為江淮
荆浙等路發運使罷寶文閣直學士知成都府指揮以
諫官梁燾范祖禹吳安詩御史朱光庭等言京黨附蔡
確故也 八月十四日劉淑特罷祠部郎中莫君陳罷
兩浙提刑與知州差遣以言者論淑先知蘇州日與君
陳不受理章惇彊買崑山民田事也 十二月二日正
議大夫章惇降授通議大夫提舉杭州洞霄宮先是以
左諫議大夫梁燾左司諫劉安世右司諫吳安詩言章
惇違法買田罰銅十斤所責大輕未厭公議况惇與蔡
確黃履邢恕素相交結自謂社稷之臣天下之人指為
四凶陛下無恤反汗之嫌自養遺虎之患宜候惇服闋

特行廢置八月十九日詔章惇服闋與官觀差遣故有是命元祐五年正月二十四日河東路經畧使龍圖閣學士左朝散大夫曾布特降一官改知河陽以本路將官宋整實病而攝入禁致觸階而死故有是命四月一日龍圖閣直學士鄧溫伯兼侍讀提舉醴泉觀其新除翰林學士承旨告上之以言者論其資質柔佞隨事俯仰冒耻苟進為公議所薄也五月二十六日新除大學博士秦觀罷新命別與差遣以右諫議大夫朱光庭言觀素號薄徒不可以為人師故有是命八月二十四日客省使嘉州刺史王光祖為太原府路副總管時光祖除知邢州御史中丞蘇轍言其知瀘州用刑

慘酷買金虧價不可以長民故有是命

九月十八日

新除集賢修撰樞密都承旨黃廉依前職為陝西都轉運使以殿中侍御史上官均言廉在元豐初嘗為御史與蔡確鞠相州獄廉曲意附確鍛鍊士人悉皆無辜被罪故有是命 十月十八日左侍禁閤門祇候東南第

九將雷瑜特追閤門祇候勒停坐託疾不赴邵州策應

故也 十二月十四日殿中侍御史上官均知廣德軍

以均言尚書右丞許將不當罷執政中丞蘇轍侍御史

孫升等論均附會大臣意姦邪不忠故有是命 六年

正月十九日資政殿學士知蔡州王安禮知舒州二十

六日又落資政殿學士以右正言劉唐老言頃在青

州貪穢不法故也

八月十二日新除成都府路轉運

使劉珵改差知邠州以給事中范祖禹言珵與蔡確交

結醜迹士大夫所共知故也

二十八日涇原路第十

將西染院使李浦副將如京副使張蘊各特降兩官銜

替權同副將供備庫副使王祕特展磨勘三年差替以

懷遠寨監押供奉官李遜與西賊鬪敵被圍而浦等觀

望不救且供報誕妄也

九月二十二日河北都轉運

使蔣之奇罷新除刑部侍郎以中書舍人孫升言之奇

昔為御史以陰私事中傷所舉之人歐陽修故有是命

十一月八日皇城使嘉州防禦使管勾鄜延路軍馬

公事張若訥降一官皇城使太原路都監知麟州孫咸

寧降兩官銜替皇城使泉州防禦使知府州折克行降
一官以斥堠不明及不預為清野之備致西賊侵犯恣
行劫掠故也 十二月十八日觀文殿大學士太中大
夫知河南府范純仁降中大夫以自陳昨禦戎失策累
章待罪蒙恩罷帥移知河南府竊恐未厭公論望再行
黜責故有是降 七年二月六日禮部侍郎葉祖洽知
海州以御史言其貪鄙凡下廉節不立故也 三月四
日左朝奉大夫前知和州孫賁特差替以殿中侍御史
楊畏言聞弟喪式假內用女優飲會論刑雖輕犯義實
重宜特懲黜以警在位故有是責 四月二十一日寶
文閣直學士中大夫兵部侍郎李之純降授左中散大

夫以知開封府日廨宇遺火故也

七月二十四日孫

咸寧罷涇原路準備使換添差監邵州酒稅御史吳立
禮黃慶基再論咸寧知鄜州守邊斥堠不明不豫清野
致西賊恣行劫掠乞削奪遠竄以警邊吏 同日鄜延
第四將宮苑副使向懷德追一官充鄜延路準備差使
以經畧司言其私役禁軍借用公庫錢及西賊侵犯綏
德城不即時策應 十月十六日左奉議郎太常博士
朱彥權通判博州以彥自陳昨與侍從官集議南郊合
祭祀事今曾肇既罷禮部臣係與肇同論之人備員禮官
俱為失職乞賜罷黜故有是也 八年正月十二日右
朝奉大夫溫俊又罷知同州令吏部與合入差遣先是

御史來之邵言俊入知耀州遣子弟載陶器入京貿易
令戶部體量是實故有是命 二月二日張利一罷知
渭州以監察御史黃慶基言涇原一路內總師律外控
羗戎邊面曠遠最為重地自非深謀遠畧智勇過人者
不可輕以畀付如利一者不特人材凡下不足以當其
任又其弟兄嘗以從叛而蒙顯戮惡逆之家安可委以
強兵付以重任及侍御史楊畏監察御史來之邵權給
事中虞策俱上言故也 五月三日日通議大夫新除吏
部尚書李清臣為資政殿學士知真定府以權給事中
姚勔論清臣不當召用故也 紹聖元年四月十一日
蘇軾落端明殿學士翰林侍讀學士降充左承議郎知

英州以御史虞策來之邵言軾元祐擢掌外內制譏斥
故也已而再有論疏於是責授寧遠軍節度副使惠州
安置 閏四月十八日詔蘇軾合叙復日未與叙復秦
觀落館閣校勘添差監處州茶鹽以監察御史劉拯上
言軾怨忿形於詔告王得君憤其誣詆上書言之被斥
以死觀浮薄影附於軾故進策謂秦二世不變始皇之
法而至於亡漢昭帝變孝武之法而存軾遂考為第一
故也 同日工部尚書李之純落寶文閣直學士降授
寶文閣待制知軍州以劉拯言其前任御史中丞阿附
蘇軾蘇轍反為其用故有是責 六月五日太中大夫
知汝州蘇轍可降授左朝議大夫知袁州

初直見
罷免門

同

日前勾當御藥院陳衍落選郡刺史降充左藏庫副使
添差監鄆州酒稅以言者論衍元祐中自王府官驟蒙
擢用方陛下未親萬機衍怙寵驕肆交通權要竊弄威
福望重行降黜故也 八日梁惟簡罷入內押班差提
舉亳州明道宮以侍御史來之邵言前勾當御藥院陳
衍依附惟簡以進不一二年驟躋要近故也 十三日
內侍皇城使張士良添差監潁州鹽酒稅皇城副使梁
知新添知監亳州鹽酒稅務坐黨附陳衍故也 十六
日資政殿學士中大夫知鄆州梁燾落資政殿學士降
授左中散大夫知鄆州以右正言張商英言當呂大防
擅權時相為表裏中傷無罪故也 同日左承議郎充

寶丈閣待制知盛德軍劉安世落寶丈閣待制降一官
知懷安軍左朝奉大夫直集賢院管勾西京嵩山崇福
宮吳安詩落直集賢院降一官監光州鹽酒稅以言者
論其皆由權貴親黨躡取要官圖復怨仇也 七月十
七日詔奪呂希純寶丈閣待制司農卿以張商英論於
元祐中繳駁詞頭不當及附會呂大防蘇軾也 十八
日詔司馬光呂公著各追所贈官并謚告及追所賜神
道碑額王巖叟所贈官亦行追奪 同日通奉大夫范
純仁特降一官以三省言純仁朋附司馬光變亂法度
首建棄地之議滋養邊患故也 同日左宣德郎差監
處州茶鹽酒稅務秦觀降一官以監察御史周秩言其

罪重責輕再有是命 同日詔陳衍傲狠不恭威行宮
省遇事專肆多不奏聞同類畏之莫敢指目據其罪惡
當伏重誅姑示寬仁未欲置之極典可追毀出身已來
文字除名勒停送白州編管以右正言張商英言按衍
與宰臣呂大防交通干預大政劉摯未除相前十日人
已知之蘇頌未罷相前十日人已知之其姦狀明白中
外共知欲乞削奪衍官配流海島故有是詔 二十七
日唐義問罷知廣州以御史來京邵言其在元祐中棄
梁陽寨也 八月二日丁憂人前左朝請郎竇文閣待
制范純粹降一官為直龍圖閣知延安府以御史耶知
章論其在元祐間嘗獻議棄安疆葭蘆吳堡米脂等寨

故也 九月十六日唐義問責授舒州團練副使胡田
李備並降授供備庫副使胡田充廣南西路經畧司李
備充熙河蘭岷路經畧司並准備差使余卞追因棄渠
陽授賞所轉兩官并所循一資特勒停歐陽中立追所
循一資依衝替人例所追官資仍並不用叙法以樞密
院言按義問累奏乞廢渠陽等寨後因蠻人詐過統兵
萬餘措置乖方奏報欺罔而李備胡田遺棄官擅行斬
戮勾當公事官余卞兩上書乞棄渠陽及差領中軍至
洪江若水應接官軍身不親到勾當官歐陽中立撰征
蠻記謬妄失實義問先知廣州田先知鼎州卞知沅州
中立知黔陽縣並已先次放罷再有是責 二十六日

涇原路副總管苗履責授太子左清道率府副率房州

安置以經畧使孫覽言差履統制軍馬策應西賊拒抗

不行故有是命特責馬十一月一日河北西路提舉官孫載

送吏部坐不奏陳流民故也十二月十一日知深州

吳安行特衝替坐不受民訴災傷故也二十七日龍

圖閣直學士提舉亳州明道宮范祖禹責授武安軍節

度副使永州安置翰林侍讀學士提舉兗州仙原縣景

靈宮太極觀趙彥若責授安遠軍節度副使澧州安置

集賢校理管勾亳州明道宮黃庭堅責授涪州別駕黔

州安置以臺諫章疏言所修實錄多詆斥故也二年

正月九日呂大防特追奪兩官趙彥若范祖禹陸田曾

肇林希黃庭堅各追奪一官以御史中丞黃履言其修纂先帝實錄厚加誣毀也

詳見修

二月五日呂大防

降一官以權中書舍人劉定及右正言劉拯言累論奏大防提舉編修實錄挾怨誣詆故也

詳見修

三月二

十八日供備庫副使李惟永降充供備庫副使仍添監汀州商稅鹽務以詔書言其前後陳述矯直似忠不循分守故也 六月七日皇城使李元輔降為皇城副使准備將韓廉降監當差遣部將雷周勒停以廊延路經畧使范純粹言元輔廉與西賊戰退走周不救援故也 八月十六日張商英罷左司郎中添差監商州酒稅務先是穎昌府民蓋漸訟侍御史來之邵令子娶蓋氏

規奪祖業誣漸非蓋氏子下有司根治商英時為右司
諫數論其事其後坐令僧奉召及開封府皂侯璋與漸
計會情弊故有是命 九月三日前齊州司理參軍王
世存推官張宗並特勒停通判滕希靖特衝替知州朝
請郎杜紘審問官京東路轉運副使朝散大夫范諤各
降一官以刑部言齊州官吏失入張宣死罪皆係去官
雖會赦原特責之 二十日監察御史常安民可罷監
察御史送吏部與監當差遣先是安民數論事無所阿
比論章惇以大臣為紹述之說實假此名以報復私怨
一時朋附之流從而和之遂至已甚故凡勸陛下紹述
者皆欲託先帝以行姦謀謂它事難感聖慮若聞先帝

則易為感動故欲快恩讎陷良善者須假此以移陛下
心意至引王鳳亂漢林甫亂唐以此博擅作威福論蔡
京巧足以移奪人主之視聽力足以顛倒天下之是非
朝廷之臣大半為京死黨它日援引群姦布滿中外雖
欲去之無及論張商英在元祐之時上呂公著詩求進
其言諛佞無耻士夫傳笑近為諫官則上疏乞毀司馬
光呂公著神道碑周秩在元祐間為太常博士親定司
馬光謚曰文正近為言官則上疏論光公著乞劉棺鞭
尸陛下察此輩之言果出於公論乎又論林希李琮不
當違新制權尚書侍郎吳居厚宣仁所斥不宜從待制
傅等積怒合史排陷譖毀日間它日上問曰尚卿嘗上

呂公著書比朕為漢哀帝安民對曰臣在元祐初獻書
公著勸其博求賢才嘗引陳蕃竇武李膺事不謂惡臣
深者指摘臣言推其世以文致臣雖辨之何益於是監
察御史董敦逸奏論安民前嘗稱二蘇文章士負天下
重望不當彈擊乃軾轍之黨平居論議主元祐者詔罷
安民御史與知軍而惇批詔語乃擬送吏部與監當
十月七日錢總落翰林學士制誥兼侍讀知池州以臺
諫黃履翟思劉拯言總嘗批答不允雍所請詔草有群
邪共攻之語代言不實章在朋比故特黜之二十五
日知開封府王震落龍圖閣直學士降授朝散郎知岳
州司錄參軍陳厚降為通直郎監浙州茶鹽酒稅時大

理卿路昌衡左正言孫諤言震為知章惇主張蓋漸家財震與惇不相得令厚節外勦出許與良偕等錢數事進呈欲證惇庇蓋漸事皆挾情上批王震等陰謀附會賊害忠良欺罔朝廷侮玩獄事宜加深責以誠中外故也十一月六日太府少卿范諤知壽州諤自轉運使入對言有捕盜功乞賜章服上謂輔臣曰捕盜常職也何足以言功故黜之十三日太中大夫充寶文閣待制知開封府蔣之奇降授左朝議大夫皇城使嘉州刺史權發遣本路兵馬都監高永享朝奉郎通判熙州王本並衝替內永亨仍特降遙郡一官以樞密院言按照河蘭岷路經畧司分畫地界遷延并西人掠取軍司並

不申奏永亨申狀虛誕故有是命而之奇先任經畧使亦預責焉 十四日入內東頭供奉官康德輔降一官坐施帳蔽車以觀車駕法當罰銅特有是責 二十二日提舉亳州明道宮梁惟簡除名送全州安置其後永不收叙以三省言惟簡負罪當誅先帝曲加容貸不能感悔復引陳衍濟其餘惡惟簡仍居要職今衍已竄嶺表而惟簡猶以使職領宮觀刑不稱罪故也 三年正月二十日西上閣門副使苗履特責授太子右清道率添差監峽州酒稅以進狀稱孫覽挾情劾已絕無悛懼之意故也 二十一日楊畏落寶文閣待制依舊知河中府中書舍人盛陶繳還詞頭遂移知虢州以右正言

孫諤言畏在元豐間為御史其論議皆與朝廷合及元祐末呂大防蘇轍等用事則盡變而從之紹聖之初陛下親政獨斷則又偷合詭隨締交執政傾亂朝廷天下之人謂之三變今畏罷帥真定仍以寶文閣待制知河中府非所慰公議故有是命 五月七日孫諤罷右正言差知廣德軍以詳定重修敕令蔡京言諤所言役法詆誣先朝故有是命詳見役法門 二十五日知睦州呂希純知歸州以隱匿不回避張次元親故也 七月二十八日集賢殿修撰知潞州呂陶落職差監潭州南嶽廟通判范鉞特追一官令吏部與監當以雜常平斛斛納下私小錢三萬餘貫容縱私鑄惠姦民故也 八

月二十三日責授武安軍節度副使永州安置范祖禹
責授昭州別駕賀州安置責授奉議郎試少府少監分
司南京南安軍居住劉安世見分司南院已特責授新州
別駕英州安置以元祐中造誣謗故也 九月十三日

前福建路轉運判官文勛前兩浙路轉運判官陳安民
並吏部與合入差遣以奉使無善狀故也 十月十二

日姚勔落寶文閣待制管勾杭州洞霄宮以寶文閣待
制知瀛州路昌衡言勔無行尚玷從班今止罷磨勘罪
大罰輕故有是命 十二月三日知同州寶文閣直學
士呂大中降授寶文閣待制差遣如故以陳奏邊事與
元祐所言反覆故也 四年二月四日故司空同平章

軍國重事呂公著可追貶建武軍節度副使故正議大夫守尚書左僕射兼中書門下侍郎司馬光可追貶清海軍節度副使故端明殿學士左朝請郎王巖叟可追貶雷州別駕奪趙瞻侍養俞贈謚追韓維致仕及孫固范百祿胡宗愈遺表恩例以三省言司馬光呂公著唱為姦謀詆毀先帝變更法度及當時同惡之人偶緣已死不及明正典刑尚且優以恩數及其子孫親屬使後世亂臣賊子何以創艾至於告老之人雖已謝事亦宜少示懲沮故也 五日詔大常昨緣文彥博致仕所授五臺主簿特追奪 七日承議郎張競辰罷提舉夔州路常平等事以御史蔡臨言其嘗謫事呂大防蘇轍故

也 二十三日內殿承制提點都亭驛班荆館兼提點

修營所黃卿從添差監南安軍鹽稅係陳衍黨人故也

二十八日詔降授中大夫守光祿卿分司南京安州

居住呂大防青授舒州團練副使循州安置降授左朝

議大夫試光祿卿分司南京蘄州居住劉摯青授鼎州

團練副使新州安置降授左朝議大夫試少府監分司

南京筠州居住蘇轍責授化州別駕雷州安置降授左

中散大夫守少府監分司南京鄂州居住梁燾青授雷

州別駕化州安置

大防等分司東

並見分司四降授通議大夫知隨

州范純仁責授武安軍節度副使永州安置資政殿大

學士太子少傅致仕韓維落資政殿大學士特降授左

朝議大夫致仕左朝議大夫充天章閣待制提舉亳州
明道宮范純禮落天章閣待制依前官管勾亳州明道
宮蔡州居住朝請大夫充天章閣待制提舉亳州明道
宮趙君錫落天章閣待制依前管勾亳州明道宮本處
居住朝請大夫充寶文閣待制提奉南京鴻慶宮馬默
特落寶文閣待制依前管勾南京鴻慶宮單州居住朝
散大夫天章閣待制知歙州顧臨落天章閣待制依前
管勾洪州玉隆觀饒州居住降授朝散郎充寶文閣待
制知滑州范純粹落寶文閣待制依前管勾江州太平
觀均州居住朝散郎充寶文閣待制知宣州孔武仲特
落寶文閣待制依前管勾洪州玉隆觀池州居住中散

大夫充賓文閣待制致仕王汾落賓文閣待制依前官
致仕朝請郎充集賢殿修撰知饒州王欽臣落集賢殿
修撰依前官管勾江州太平觀信州居住承議郎直龍
圖閣管勾亳州明道宮張耒落直龍閣依前官添差監
黃州酒稅朝請大夫管勾亳州明道宮呂希績降授朝
請郎差遣依舊光州居住降授朝請郎監均州酒稅務
吳安詩責授濮州團練副使連州安置承議郎充秘閣
校理通判亳州晁補之落秘閣校理依前官添差監處
州鹽酒稅務知齊州賈易添差監海州酒稅務通直郎
程頤追毀出身文字放歸田里并錢勰楊畏並依紹聖
二年八月二十一日指揮永不叙復郴州編管秦觀移

送橫州編管吳安詩秦觀令所在州差職員押伴仍謹
護視之未光庭追貶柳州別駕孫覺趙高並追職并兩
官及遺表恩例李之純追職及遺表恩例杜純追職李
周追貶唐州團練副使以三省言近降朝旨以司馬光
等為姦謀誅毀先帝變更法度各加追貶其百尾附會
之人亦稍奪其所得恩數其餘同惡相濟幸免失刑者
尚多亦當量罪示其懲艾故有是命 閏二月一日太
師致仕文彥博諸子並令解官侍養司馬康追奪贈官
二日朝請郎尚書屯田員外郎分司南京隨州居住
韓川特責授岷川團練副使道州安置朝請郎尚書水
部員外郎分司南京峽州居住孫升降責授果州團練

副使汀州安置以附姦凶譏訕故也 五日觀文殿學士太中大夫知定州韓忠彥可依前官降充資政殿學士七日鄭雍落資政殿學士依前太中大夫知大名府安燾落觀文殿學士依前左正議大夫知鄭州並以中書舍人蹇序辰言其附會姦惡同為毀訛也 同日故朝奉郎試中書舍人孔文仲追貶梅州別駕及追遺表恩例鮮于侁追左諫議大夫集賢殿修撰故朝請郎吳處厚追貶歙州別駕 十七日葉濤可罷中書舍人依前官知光州以不草安濤降授資政殿學士詰詞也 十九日寧遠軍節度副使惠州安置蘇軾責授瓊州別駕移送昌化軍安置韶州別駕賀州安置范祖禹移送

賓州安置新州別駕英州安置劉安世移送高州安置

四月十八日故追貶建武軍節度副使呂公著特追
貶昌化軍司戶參軍故追貶清海軍節度副使司馬光
特追貶朱崖軍司戶參軍公著制詞畧曰廢體國之大
義忘事君之小心陰結姦臣私懷異意謗訕先烈變亂
舊章積惡終身久益暴露光制詞畧曰嘗與山黨寶藏
禍心至引宣訓衰亂不道之謀借諭寶慈聖烈非意之
事興言及此積慮謂何雖免嚴誅載加貶秩盖用邢恕
之譖也 十九日詔范純仁元祐四年罷相恩例不追
奪其已追奪並給還王巖叟依呂大防等例追奪司馬
光呂公著遺表恩例並依例追奪又詔趙鼎追元任太

中大夫中大夫兩官并歷任職名所有贈官亦行隨奪
更有似此者依此施行因吏部刑部有請也 二十四

日故金紫光祿大夫守尚書左僕射兼門下侍郎贈太
師王珪追貶萬安軍司戶參軍從給事中葉祖洽請也

五月二十四日降授左朝議郎大夫致仕韓維青降崇

信軍節度副使致仕均州居住以三省言其乃先帝東
宮舊臣在元豐末明附司馬光最為盡力故也 八月

二十二日西上閣門使端州刺史權環慶路兵馬都鈐
轄張存落遙即刺史降本路兵馬鈐轄以統制將兵牽
制涇原進策逐西賊開敵失亡數多故有是命 九月

二十七日折可適辛叔獻特追諸司副使文思副使曲

充特降兩官原州通判李之儀特差替經畧使章棻特
罰銅二十斤以涇原路進築日同統制擅遣充作先鋒
繼領人馬追賊亡一百三十三人叔獻總領番兵輕易
出塞亡失士馬付原州根治雖會兩赦特罪之李之儀
以鞠勘鹵莽經畧使章棻以失案舉故併坐 十一月
二十三日中大夫郴州安置劉奉世責授隰州團練使
郴州安置知常州劉當時差監潭州衡山南嶽廟以御
史中丞邢恕言奉世兄弟元祐間附呂大防等也 十
二月十七日秘閣校理劉唐老落職添差監桂陽監茶
鹽酒稅賣礬務以唐老元祐黨人故有是命 元符元
年三月九日詔徙內侍張士良羈管于白州先是章惇

蔡卞痛詆垂簾結宦官郝隨為助於上欲追廢宣仁聖
烈皇后自皇太后皇太妃皆力爭之上感悟焚惇卞所
上章隨覘知之不悅密語惇卞明日再上奏堅乞施行
上怒曰卿等不欲朕入英皇宗廟乎以其奏詆地惇卞
不得已請於雷州取宣仁殿御藥官張士良付詔獄士
良至即以舊御藥院告并列鼎鑊刀鋸置前謂之曰言
有即還舊官言無即就刑士良仰天大哭曰太皇太后
不可誣天地何可欺也乞就戮奏至上不以惇卞為直
遂徙士良白州押赴貶所 四月十四日御史中丞兼
侍讀邢恕知汝州以私懷怨憎楊言排擊妄意進用不
計後先故有是命 五月三日詔劉摯梁燾諸子並特

勒停永不收叙先是少府監主簿蔡確奏叔父頌曩於
邢恕處見文及甫元祐中所寄恕書且述姦臣大逆不
道之謀及甫乃彥博愛子必知當時姦狀詔翰林學士
承旨蔡京同權吏部侍郎安惇即同文館究問初及甫
與恕書謂司馬昭之心路人所知又濟之以粉昆朋類
錯立欲以耿弼為甘心快意之地及甫嘗語蔡頌謂司
馬指劉摯粉昆指韓忠彥眇躬及甫自謂後蔡確毋
又言梁燾嘗與懷州致仕官李珣言朝廷若存確則當
除邢恕以告邢恕詔令恕詳具以聞其後三省及又言
李珣元祐中常對尚洙說梁燾語言詔李珣限指揮到
日畫時供具從初語言詣實仍結罪妄無漏落實封以

聞既令恕詳具以聞而又以詰珣至是洙等所言無實
乃詔逐人偶皆亡不及考驗故特有是命 六月一日
徙方澤知萬州以權吏部尚書葉祖洽言近照驗在部
官名籍伏見方澤熙寧十年為提舉官奉請乞放罷見
顧役人將三等戶仍舊差役坐不知職守詔送審官
東院與合入差遣而澤於元祐二年訴理遂得除落元
豐指揮繼除知州差遣外議未安故也 十四日知霸
州李昭珙降一官通判侍其琮追一官勒停權通判寇
穀並依衝替人例推官郎渙差替界河同巡檢王溥勾
當推場徐昌明各追一官劉家渴莫金口巡檢賈岳刀
魚巡檢楊拯各追一官勒停河北路沿邊安撫使東上

閤門使資州刺史李諒落遙郡別與差遣副使劉方降
一官機宜張崇差替昭珙等坐昨為壯人盜拆霸州橋
入推場殺傷人兵並無指畫亦不豫為隄防雖該赦特
責之 九月二日詔王珪諸子並特勒停永不收叙以
權吏部尚書葉祖洽言近劉摯梁燾諸子並勒停永不
收叙王珪罪惡比摯等最為暴著今罪罰輕重不相准
何以慰天下故有是命 十六日詔大防諸子並勒停
永不收叙以權殿中侍御史鄧棨言大防子景山見任
宣義郎乞依范祖禹等諸子例 二十一日詔罷江淮
荊州等路制置發運使呂溫卿仍就近供答文字有罪
不以前來赦原以察訪孫諤言其不法故也 十月十

四日奉議郎權知陝州馬城降為通直郎以元祐間嘗
言元豐傳致鍛鍊却就深刑故有是責同日王觀特責
授鼎州團練副使澧州安置以省詳訴理所言元祐臣
僚上言乞展訴理日限所貴銜寃之人皆得洗雪按所
言於先朝不順故有是責 二十三日朝奉大夫前夔
州路提舉閭令降為朝請郎先是令因推勘王先祖事
特追兩官勒停元祐除落顯屬不當其元祐指揮勿行
同日新除京東路轉運判官秦定知濠州以權殿中
侍御史鄧鼎言定項綠姪觀與蘇軾蘇轍厚善遂擢監
司乞罷新命 二十五日朝散郎汪衍瀛州防禦推官
余奕並除名勒停永不收叙衍送昭州奕送封州編管

仍備坐本人所上書行出先是三省言衍與元豐末各
上書詆訕先朝與又元豐祐中曾上書乞宣仁歸政險
詐反覆故有是命 二十六日邢恕特降授承議郎知
南安軍以中書省言元祐間恕為起居舍人上書言王
安石之短呂惠卿之姦及言韓維端諒名德乃與司馬
光呂公著一等故有是詔 二十九日朝請郎秘閣校
理權知潞州歐陽棐落職送吏部與合入差遣坐朋附
元祐大臣故也 同日王恕特落軍權依舊吉州刺史
充熙河蘭會路副總管以經畧司言恕北討賊不能深
入破蕩巢穴故有是命 十一月三日詔孫杞緣右司
郎中身亡合得恩例勿行以殿中侍御史鄧棐言其察

訪河北日曾薦執政大臣親黨門人也 四月故通直
郎宋保國追毀出身已來文字除名以三省檢會元祐
七年保國曾奏請太后太后行躬謁太廟之禮也 九
日朝散郎王鞏特追毀出身已來告勅文字除名勒停
送全州編管通直郎張保源特勒停仍展三期叙峽州
居住坐元豐元祐累上書議論朝政故也 二十一日
朝散大夫謝景初男謝惓特勒停韓忠彥王存各贖銅
三十斤以看詳詐理文字所言朝散大夫謝景初昨任
成都府路提刑有踰違特追兩官勒停元祐初孫永李
常韓忠彥王存乃奏景初事出曖昧顯涉冤抑特與奏
雪而惓亦坐與其父詐理言涉不順故也 二十三日

陳禹功特送隣州編管以看詳訴理所言元祐訴理除雪故屯田員外郎陳舜俞不奏行常平法降監當等不當及其子陳禹功妄有言故也 二年正月十七日資

政殿學士太中大夫知大名府韓忠彥資政殿學士右正議大夫致仕王存各降一官先是中丞安惇言存忠彥奏雪謝景初語言不順各罰銅三十斤議罪未愜故有是命 二十四日詔奪趙景先元授恩澤以看詳訴理文字所言元祐訴理所公案前知徐州趙鼎在任於官船附帶私物及以買絹為名差破人船附載骨肉各坐私罪元祐二年特與除落本所看詳顯屬觀望及吏部供元祐四年呂大防等劄子陛下臨御之初察鼎非

辜身亡其家無人食祿殊可矜憫子景先推恩補郊社
齋即詔元祐指揮更不施行 同日朝散郎差知吉州
周邠送吏部與合入差遣以訴理不當故也 二十四
日奉議郎充高密廣平郡王院大小學教授陳并送吏
部與遠小監當差遣以嘗上書毀佛道不當也 三月
十一日吏部員外郎孫諤送吏部與合入差遣以監察
御史兼權殿中侍御史左膚言諤在元豐中以監制勅
庫漏落條貫罷去而元祐中三省有訴陳且言幸遇朝
廷欽恤使銜寬飲恨者皆得以上聞諤獨指元祐為欽
恤則是先帝未嘗欽恤故有是命 十六日朝奉大夫
致仕葉伸特降三官陳鄂吳儔蘇嘉朱光裔並特勒停

以御史中丞安惇言元祐初姦臣置訴理所將熙寧元
豐以來斷過刑名輒行奏雪陛下委官考閱案牘凡十
餘人其元斷重輕一一當罪已具聞奏改正元者詳官
劉摯孫覺胡宗愈傅堯俞管勾大字葉伸蘇嘉禾光裔
吳儔陳鄂等罪跡顯著義不可容故有是命 二十二

日熙河蘭會路經畧判官授宣德郎鍾傳責授連州別
駕韶州安置試戶部侍郎陸師閔落職知蘄州前權知
熙州直龍圖閣張珣特責授歙州別駕池州安置前秦
鳳路提點刑獄故陳敷夫追元與一子官及所賜錢熙
河蘭會路經畧司勾當公事宣德郎陳中夫特除名勒
停歙州編管司戶參軍錢升特除名勒停秦鳳路經畧

司管勾機宜承議郎任鯤特勒停熙河蘭會路經畧司
勾當公事宣議郎董采承議郎李夷行熙河路經畧司
管勾機宜文字承務郎李毅通遠軍通判奉議郎李深
僉判承事郎胡泳各特降一官內李毅無官可降展四
年磨勘董采仍衝替陝西轉運司勾當公事承議郎宗
愿熙河路經畧司勾當公事禮賓副使王原各特降一
官通判熙州奉議郎孫适特降兩官侍禁王士元滄州
司理參軍章繼特勒停侍禁康厚降一官走馬承受入
內供奉官周珪特追一官勒停前東頭供奉官滿志行
特除名勒停岳州編管熙河蘭會路鈐轄崇儀使成州
刺史王舜臣追十官除名勒停留充涇原路効用準備

使喚熙河蘭會路都監知河州皇城使榮州防禦使王
瞻追十一官免勒停權管勾河州及安撫司公事熙河
第五將知道通遠軍降授莊宅副使康謂追七官免勒停
權管勾通遠軍權岷州皇城使昌州刺史李澄追十四
官免勒停權管勾岷州熙河路都監右驤驎副使李澤
追十官特除名勒停送均州編管熙河第二副將文
思副使秦世章追十八官特除名勒停送江州編管熙
河第一將左驤驎使姚師閔追十二官勒停河州都總
管領蕃兵將皇城使劉戒追十七官勒停熙河第三副
將莊宅副使張論追十五官勒停熙河第五將前崇儀
使辛叔獻追三官勒停副將西作坊董隱追四官蘭州

都總領蕃官將禮賓使李忠追一官餘部隊將使臣人吏敢勇効用等各等第追降勒停編管決配有差內曾有戰功並聽陝西河東路經畧司留充効用準備隨軍使吳傳等皆以白草原討蕩安增首級冒受功賞虛上首級與使臣親戚付秦州制勘得實故有是命 四月六日看詳訴理所言元祐訴理不當宋喬年梁鑄衝替元祐改作差替符守規衝替事理重改作事理輕王安上追兩官勒停改作追一官王棫張舜民曹輔劉符元追兩官改作追一官李夷行陳述之元追三官衝替張升元祐元追兩官勒停並與除名王覺職罪改作私罪王防私罪徒改作私罪杖同常差替與除落乞重行改正

詔元祐指揮更不施行 十七日董必罷新除工部員
外郎以左司諫權給事中陳次升言必劾衡州難常米
置獄潭州瘦死者三人故也 二十二日朝奉郎水部
員外郎分司南京睦州居住黃隱特責授平江軍司馬
南安軍安置以與元祐黨偷合取容也 二十六日陳
次升罷職添差監全州鹽酒稅以在元祐間任御史所
上章疏率附會權臣詆毀先政故也 五月二十四日
如京副使韓資罷涇原西路同總管令吏部與閤慢差
遣以元祐中訴父存寶事語涉不順也 六月二十三
日監內香藥庫李之儀放罷以權殿中侍御史石像言
之儀因蘇軾知定州日薦辟勾當機宜文字豈可更居

此職故有是命

八月五日龍圖閣待制盛陶知和州

以言者論陶昨在元祐中緣詆毀先烈協比權臣排毀

舊弼故也

九月十一日觀文殿大學士降授通議大

夫知陳州范純仁可落觀文殿大學士知隨州以純仁

言呂大防等竄謫江湖已更年紀未蒙恩旨久因拘囚

伏願宸衷獨斷因大禮赦文放令逐便使得自新改過

詔以純仁立異邀名故有是責

閏九月一日朝請郎

賈易特旨授保靜軍司馬邵州安置以言者論易在元

祐中任臺諫誣毀先烈也

二日奉議郎知昌州文輅

奉議郎通判泗州沈街宣德郎持服人王高淮南節度

推官知達州新寧縣張湜各特衡替奉議郎楊阜依衡

替人例以訴理所言輅等進狀語涉譏訕故也 三日
知解州劉斐通判劉公明同監解池郭群鄭道安張侁
監安邑池蘇之純解敞劉世隆各特除名勒停送逐處
編管判官崔貫之推官劉公謹監門李景張琪安邑主
簿劉志虞鄉縣尉陳希高各特勒停仍展五朞叙錄事
參軍權推官徐琮特銜替權判官高興禮特銜替人
例施行安邑縣尉畢大純特差替以解鹽池決濫斐等
坐不謹護視故也 八日李公弼陸彥回李復杜譚王
箴李惇李禮謝堃鄧球方希哲董夔方次夔袁衍劉唐
肱各特銜替馮豫崔振王申周惟和張松年郭復張寶
臣王常張茂先各特差替並坐訴理言涉詆訕故也

同日王吉甫知鹽州以安惇言吉甫授蔡河揆發臣昨
被旨者詳訢理文字辟吉甫充管勾官觀望畏避不肯
就職故也 九日奉議郎前知揚州江都縣呂振追出

身已來文字除名勒停撫州編管

職故也

十四日涇

原路第三將副皇城使孫文皇城副使許元凱降一官
並降充准備將領西京左藏庫副使翟士彥降一官充
准備差遣以不體探西賊動息致八巡檢入界為西人
掩殺也 十八日涇原路經畧使端明殿學士太中大
夫章綬降授中大夫以稽留朝命不即修置烽臺故也
二十六日宣義郎試起居舍人充崇政殿說書周常
特降兩官添差郴州茶鹽酒稅先是常以狀申臺出送

黃履又鄧洵武等分析周常言黃右丞之出為救鄒浩志在廢法取名故也 十月十九日朝請郎權刑部侍郎周之道降授朝散郎差遣如故降朝奉大夫許介卿罷刑部侍郎降授宣義郎錢蓋罷刑部員外郎皆坐出送右丞黃履知亳州也 二十六日郭知章罷中書舍人以前言充集賢殿修撰知和州魯君貺罷司農少卿以前官知均州王森罷倉部郎中梁轉罷工部員外郎鄭佐追所授恩賞責授鼎州團練副使筠州安置李仲李偉追所授恩賞仲添差監永州在城酒稅務偉添差監全州鹽酒稅並候任滿日更不差人俞瑾罷都水監丞文及甫差知漢陽軍呂希純責授舒州團練副使道

州安置王令圖王宗望追所授恩賞其應緣恩賞轉官
所得恩例今所屬追奪黃思等十六員並追所授恩賞
內實訥仍令吏部與監當差遣以元祐間主導河東流
之議無功也 十一月七日翰林學士知制誥兼侍講
蔣之奇落職知汝州寶文閣待制權知開封府嘉嘉間
落職知懷州權吏部尚書葉祖洽罷知濟州奉議郎王
回除名勒停奉議郎勾當雜買務田衍奉議郎監元豐
庫王琳奉議郎岑棫承議郎秘書省正字吳師禮宣德
郎李友諒承議郎兼權貨務陳舉朝請郎都官員外郎
朱紱承議郎諸王府翊善傅楫通直郎監在京翹院胡
安修越州山陰縣主簿范致君各特追一官勒停宣德

岑穰秘書省校書郎白時中樞密院編修文字張庭監
元豐庫將球吏部員外郎畢漸考功員外郎蔡臨承議
郎張琳太學博士范致虛各銜替宣德郎秘書省正字
葉承差替王溥落閣門祗候勒停坐與諫官鄒浩語言
交通及以錢銀遺浩且致簡叙別也 十五日詔尹材
追毀出身已來文字仍令河南府體訪有無子孫仕宦
具名以聞以給事中劉拯言尹材係知河南府孫固以
遺逸薦於朝特授虢州司戶參軍上太皇太后書語言
狂妄故也 十一月二日知祁州馬仲良追兩官免勒
停仍不用叙法以不詳悉根磨進築平夏靈平役兵死
亡人數故也 三年正月十五日責診視大行皇帝醫

官秦玠元耿愚等並除名勒停編管除奪官罰金有差 二月四日寶文閣直學士左朝議大夫新知成都府孫路落職知興國軍坐前帥熙河日王瞻乘虛擣青唐而路輒追回援兵致失機會故也 三月十七日朝奉郎直龍圖閣權發遣陝府文及甫落職初及甫除都司為劉摯論列又摯常論彥博不可除三省長官故止為平章事又彥博致仕及甫自權侍郎以修撰守郡母喪除與恕書論請補外置因為躁忿詆毀之辭蔡渭奏其言詔即同文館根問及摯對以昭比摯以眇躬指上而粉昆謂指王巖叟梁燾巖叟面如傅粉故曰粉燾字况之以况為兄也所言皆亡狀至是中書舍人張商英上

言欲正其罪上以及甫數更赦宥止行鑄職 十九日

詔太常少卿曾敗孫傑丞吳綱博士王允中鄭居中各

降一官收仍與小郎以太常寺昨議三年服制稱易月

公除可以聽樂非是故也 五月二日貶前知涇州王

瞻為諸衛將軍房州安置隴右同都巡檢使王厚為太

子古率府率添差監隨州酒稅瞻厚盜青唐庫物及妄

誅首領九因隱其物產上以事連將士不欲窮治姑從

薄責仍諭將士知之 十六日王祖道罷左司諫知海

州坐阿諛苟容畧無獻替也 十八日入內侍省西

京左藏庫使武球送吏部以拙人苛虐且嘗與瑤華詔

獄故也 二十二日內侍高品白謂編管唐州坐奏䟽

乞皇太后不候陞祔還政仍以副本納樞密院上諭輔臣以故事內侍不許言事故有是責 二十七日知河南府孫覽降二官以京西北路提舉常平方宙體量到河南府諸處解發到盜賊計一百三十餘名覽悉親加評治致斃於捱楚者十人故有是命 七月二十一日安惇落職寶文閣待制依舊知潭州前廣東轉運判官鍾正甫前監察御史左膚石豫並送吏部以言者劾正甫頃在廣東受臺牒往新州追攝邵浩詔獄欲置浩於必死造意為虐寶自惇等而正甫觀望風旨奉行過當故皆貶之 九月十六日詔蹇序辰安惇並特除名追毀出身以來文字放歸田里文及甫蔡渭送吏部與小

監當紹聖中安惇奏乞委官取元祐理訴所公案看詳
改正申明從初加罪之意復依元祐施行詔委塞序辰
徐鐸而序辰輒將臣僚章疏傳致語言指為謗訕凡因
看詳施行者千餘人又乞以其事付史館修入實錄并
編類貶責臣僚所言所行事狀內有文及甫與邢恕書
蔡渭援以為證進狀追訟司馬光呂公著劉摯呂大防
梁燾王巖叟劉安世吳安詩傳堯俞朱光庭范祖禹蘇
軾蘇轍等害其父確謀危宗社乞奪逐人所得子孫恩
澤其間存者乞正反坐之法投之嶺外以為姦臣賊子
之戒至是中書省檢會故有是責 十七日詔右司諫
陳瓘上疏言皇太后尚預政事其言失實可添監揚州

糧料院後詔瓘知無為軍 二十一日資政殿學士知
江寧府蔡卞落職提舉杭州洞霄宮太平州居住 同
日龍圖閣待制河北都轉運使張商英龍圖閣待制知
瀛州范鏜並落職商英知隨州鏜知滁州二人亦坐惇
卞黨故也 二十六日詔特進新知趙州章惇特責授
武昌軍節度副使潭州安置以中書省檢會左司諫陳
騷前後章疏論惇罪惡故也 二十九日詔龔原議論
不當罷給事中降兩官知南康軍 同日知隨州張商
英降一官以臣僚上言紹聖初備位諫官與宰相章惇
結為死黨又與百姓益漸增改詞狀要用中傷大臣到
任謝表又肆詆誣故有是命 十月二日吳居厚特落

職知和州宋喬年李公年王穀盧槩各特降一官內盧
槩仍銜替居厚嘗充哲宗皇帝靈駕橋道領通使喬年
槩公年穀提舉修治橋道為道路泥水致靈駕臨泥露
宿并鄭州迴鑾門道內地勢鍛背致力士難以著力留
滯靈駕詔御史臺制勘得實故有是命 十六日內侍
裴彥臣追五官勒停送峽州羈管令開封府差人押送
其前降依隨龍人例指揮勿行坐勾當御藥院閤守懃
在御前進呈文字而彥臣輒扣守懃之冠高聲與語靳
侮不恭侍御史陳次升彈奏乞正典刑故有是責 十
七日降寶文閣待制知延安府陸師閔為集賢殿修撰
以右正言陳祐言其頃帥永興輕變鈔法輒減物價令

下之始幾至生事故也 二十二日資政殿學士知大名府林希降端明殿學士知揚州龍圖閣待制知洪州葉祖洽落職知青州徐鐸龍圖閣待制知湖州以中書省檢會御史中丞豐稷言希助惇為惡布在王言掩宣仁聽政之明蔽永泰知人之鑒鐸編類章疏隨惇好惡為之輕重存歿名臣橫遭貶竄祖洽觀望惇意欲擅元豐未命之功誣奏王珪圖危正統皆未見施行故有是責其後言者不已希又自通議大夫降太中大夫 二十六日殿中侍御史錢適提舉京湖北路常平以通論侍御史陳次升元祐初出使詆毀鹽法附會姦臣不當在言路非是故黜之 十一月八日端明殿學士知江

寧府蔡京落職提舉杭州洞霄宮以侍御史陳次升殿
中侍御史龔史果章論其交結近習蹤跡詭秘自除邊
帥即懷怨望少弓宮祠偃蹇不行願正典刑以警在位
故有是命 十二月五日陝西路都轉運使直龍圖閣
賈種民特落職以臣僚論其謫事章惇陰陷良善創洛
口之填昔嘗敗功狹汴渠之隄今亦為病故也 建中

靖國元年正月十七日朝請郎尚書度支員外郎王詔
朝散郎光祿少卿王惲聞承議郎京西路轉運判官鄧
棐各降一官棐仍知興化軍並以任京西漕臣治道不
謹致哲宗靈駕稽留故也 二月二十二日通議大夫
知揚州林希降知舒州以右司諫陳祐言希謝表不自

引咎故也

二十六日武昌軍節度副使潭州安置章

惇責授雷州司戶參軍員外安置以左正言任伯雨累

章數其罪乞行誅戮故也 三月十七日詔龍圖閣直

學士新差知成都府孫覽降充寶文閣待制知永興軍

以辭成都府不行故也 十九日福州觀察使入內內

侍省都知梁從政降授榮州防禦使提舉亳州明道宮

本處居住以宰臣韓忠彥等奏昨聞大行皇太后宣諭

云嘗昭從政詢及定策之事從政意在黨附章惇今乃

在君側理所未安望屏黜上本無罪從政意故薄其責

二十一日詔降充千牛衛將軍房州安置王瞻除名

勒停免決刺特配昌化軍永不放還降充率府率添監

隨州酒稅王原青授賀州別駕郴州安置初瞻等領兵入青唐邈川酋長封帝藏齋簿簿書篋鑰請以獻諸朝而瞻等即開封府庫以給散將士為名盡取其金珠庫玉妄殺無辜瞻又掠蕃婦六人為婢朝廷初恐連逮者眾不欲窮治始從薄責至是熙河帥司奏青唐諸族怨入骨髓相與結集作過日圖報復至今未息樞密請斬瞻等以謝一方而言者亦有彈奏故有是責 三月二十五日寶文閣直學士知徐州胡宗回落職知蘄州坐王瞻在熙河貪功生事欲收西蕃而宗回乃起其入據青唐甫踰月蕃部背叛殺戮兵民甚眾累詔令瞻歸湟州宗回意尚依違逮以捕獲避役軍人不稟統制折可

適擅決配故也

五月四日端明殿學士知鄆州劉奉

世洛職知徐州以言者論其在元祐間先助劉摯後附

呂大防蘇轍內交陳衍相為表裏故也 十一日故資

政殿大學士贈金紫光祿大夫李清臣奪職追所贈官

十六日故太子太保司馬光降授右正議大夫太子

太保呂公著降授左光祿大夫太師河東節度使開封

府儀同三司太原尹潞國公文彥博降授太子太保光

祿大夫呂大防降授太中大夫中大夫劉摯降授右朝

議大夫左中散大夫梁燾降授朝請大夫朝奉郎王巖

叟降授定遠軍節度行軍司馬朝奉郎蘇軾降授崇信

軍節度行軍司馬其元追復官告並繳納贈左銀青光

祿大夫王存追所贈官資政殿學士太中大夫鄭雍追
所復職贈右銀青光祿大夫謚獻簡傅堯俞贈銀青光
祿大夫謚懿簡趙瞻並追所贈官及謚告贈太中大夫
趙高追所贈官已上告身並追毀朝散郎充集賢院學
士孫升追所復職朝奉郎孔文仲朝散郎朱光庭宣德
郎秦觀延福宮使入內內侍省都知定國軍節度觀察
留後贈安化軍節度使謚僖獻張茂則並追所復贈官
贈開府儀同三司范純仁追例外所推恩數中大夫劉
摯英事依前宰臣例指揮勿行 七月一日吏部尚書
陸佃贖銅十斤起居舍人李昭玘放罷朝請郎少府少
監韓粹彥降一官坐欽聖憲肅皇太皇陵奉虞主不恭

佃嘗自言故薄其罪 二十一日朱紱罷給事中知壽
州以右司諫陳祐論事不實紱為之救解故黜之 二
十七日詔降寶文閣直學士知永興軍范純粹為寶文
閣待制坐帥鄜延日論奏違事不當故也 八月二十
九日觀文殿學士提舉杭州洞霄宮呂忠卿落職以前
帥鄜延日上功冒賞言者以為附下罔上又鄜延路經
畧司奏本路自紹聖年以來前後所奏功賞例多冒妄
其間有冒二十資至一十資已上至有小使臣轉皇城
使効用轉諸司使副者不少及環慶路勘會到自効用
之例推恩最高者止於右班殿直有上件詐冒功賞並
係帥臣保奏不實故有是責 十月四日寶文閣待制

知永興軍范純粹落職知金州以言者論其不能飭兵
謹備乃於奏章數有沮壞之議故也 崇寧元年四月
十七日引進使威州刺史涇原路都鈐轄知鎮戎軍涇
原路同統制官姚古追引進使落涇原路都鈐轄朝廷
命姚雄節制瞻方還歸其後溪巴溫每送到蕃奏宗回
匿不以聞自去年九月以來湟州蕃部多羅巴等屢擁
衆出沒為患而宗回不即上聞至是樞密院條數其罪
故有是責 二十七日詔降寶文閣待制知杭州龔原
為集賢殿修撰知揚州以諫議大夫陳次升論其降授
不厭人望故也 四月二十九日詔史院官供職及二
年已上者各特罰銅二十斤以臣僚上言史院官僅十

年方修帝紀五冊兼用王安石日錄美安石而掩蔽神
考盛德故罰之 五月十三日聖旨朝請大夫秘閣校
理李德芻特落職差監華州西嶽廟以治亳州酷虐故
也 十八日左中奉大夫知蘄州胡宗回特降一官授
左朝議大夫依前知蘄州以邊事奏報不實故也 六
月四日戶部尚書王古為寶文閣待制知成都府以御
史中丞趙挺之論古裁減浮費欺罔不實又嘗與古同
領放欠事知古與吏為姦意欲盡傾天下之財而無孑
遺不可任計省之長故有是命資政殿大學士太子少
傅贈開府儀同三司孫固為係神考潛邸人已復職名
及贈官免追奪太中大夫蘇轍朝奉大夫范純粹朝請

大夫寶文閣待制吳安詩更不叙復職名端明殿學士
太中大夫范純禮落端明殿學士提舉西京嵩山崇福
宮朝請郎充集賢殿修撰韓川落集賢殿修撰管勾西
京嵩山崇福宮朝奉郎直龍圖閣知汝州張耒落直龍
圖閣管勾亳州明道宮直秘閣朝請大夫知曹州呂希
哲朝請郎知相州劉唐老朝奉大夫知蔡州歐陽棐並
落職差遣依舊朝奉大夫提舉永興軍路刑獄孔平仲
朝奉大夫淮南西路轉運副使畢仲游朝奉大夫提舉河
東路常平徐常朝奉郎知太平州黃廷堅朝散郎知密
州晁補之朝散郎軍器少監韓跋朝散郎王季劉當時
常安民承議郎黃隱通直郎張保源並送吏部與合入

依舊敘仕西
上閤門使張
巽追所復兩
官依舊差
遣應曾經
貶責人
添復官

差遣朝散郎汪衍瀛州防禦判官余與陳州別駕湯賦
更不收叙泉州教授鄭放罷通直郎常平立追所得一
子官奉議郎程頤追所復官除遺表及罷政恩例已給
還外其亡歿後所復官職已得指揮依遺表與推恩之
人並減半其三人以上餘數聽從多仍並與假承務郎
用上件恩例轉官陞資者依此比折磨甚資考年月應
送吏部人並令在外指射差遣令吏部依條差注承議
郎任伯兩准此以臣僚上言伏見先朝貶斥司馬光等
陛下即位之初當國之臣不能檢會事狀進呈以此牽
復臣愚伏願明論執政大臣使公共參議詳酌輕重行
遣又奏曾經責降人見今任監司蕃部者必不肯公心

奉行法度亦乞朝廷與勸改授閑慢差遣又言切見元符之末簾帷同聽政事之日元祐大臣乘間用事盡復紹聖間員罪責降之人或只還舊官或超授職任其復在朝廷者或見於論議祿上封章或在言路與大臣為表裏者皆有可考之實伏望聖慈令所屬取工件合該行遣之人或削奪官職或庭行懲戒各以類舉必當其罪天下幸甚故有此詔 閏六月十五日詔龍圖閣直學士知定州曾肇落職知和州肇嘗以史事與陸佃同謫至是佃罷右丞訓詞及之肇不自安上章衍罪故有是命 十八日詔寶文閣待制新差知越州邵浩可特責授衡州別駕永州安置以臣僚言詆毀椒房重泰陵

之非特有是責 二十九日故資政殿大學士右光祿

大夫李清臣特追貶安武軍節度副使新知常州豐稷

責授海州團練副使睦州安置新知諤州張舜民責授

楚州團練副使商州安置皆坐言章論其嘗於奏議及

謝表中譏訕先朝故也 七月二日降寶文閣待制新

知河中府葉祖洽為集賢殿修撰提舉建州武夷山冲

佑觀祖洽既補外官言被遇兩朝及安陳功効規欲復

留故有是責 三日觀文殿大學士知潤州曾布落職

提舉亳州明道宮太平州居住以言者交章論其援引

朋黨交結近習縱子與壻通賄賂等罪故有是責 八

日樞密直學士朝奉大夫新差知鄧州郭知章降充龍

圖閣直學士知章劄子奏臣伏見臣僚上言謂臣以臺官往相度河事實定東流之議本以從官降修撰小郎今乃翰林學士臣昨奉勅體量賑濟即不曾差相度河事王宗望議開北流吳安時等保明即臣非定議之人又臣以修撰知和州未已間已聞哲宗有旨令上殿方陛下登極首蒙聖恩拔擢兩除侍郎又除寶文閣直學士知永興軍又權尚書又除知開封府方除翰林學士今來即不敢言官辨罪先是閏六月十四日言者論及詔知章降為樞密直學士知鄧州都水使者黃思放罷知章輒具本末進呈故有是命 二十二日直龍圖閣權發遣陝西府路都轉運使孫傑落職令吏部先次與

小州傑嘗建言公邊見任官月俸米麥並移於近裏州
軍勘請鄺延路安撫使王博體量非便而言者論傑臆
見生事故有是命 二十七日詔朝散郎管勾亳州明
道宮張耒持責授房州別駕黃州安置坐以蘇軾卒縞
素而哭因言者彈論故有是責 八月八日寶文閣待
制知舒州王渙之落職以言者論其朋附臺諫也 十
三日直龍圖閣知齊州周鼎特落職知郢州戶部侍郎
徐彥孚降授奉議郎秦鳳等路提點刑獄許端卿降授
承議郎知常州朱彥朝奉大夫淮南東路提點刑獄鍾
正甫降授朝奉郎李昭圮左朝議大夫向紉朝請郎劉
唐老承議郎陳彊朝奉大夫歐陽棐朝請郎直龍圖權

發遣襄州陳察等並降一官以謫附桷臣傾搖先烈倡
從寬之邪說誣至正之典常也 二十五日實文閣待
制周常落職管勾江寧府崇禧觀婺州居住知廬州翼
原管勾成都府玉局觀和州居住端明殿學士知徐州
劉奉世落職提舉西京嵩山崇福宮沂州居住朝奉大
夫呂希純管勾南京鴻慶宮汝州居住降授承議郎王
觀管勾江州太平觀朝散大夫王古管勾台州崇道觀
謝文瓘罷給事管勾洪州玉隆觀並本處居住朝請郎
陳師錫管勾舒州靈仙觀知蔡州歐陽棐管勾台州崇
道觀朝請大夫呂希哲管勾建州武夷山冲佑觀朝散
郎晁補管勾江州太平觀朝奉郎黃庭堅管勾洪州玉

隆觀承議郎黃隱管勾舒州靈仙觀朝奉大夫畢仲游
管勾江寧府崇禧觀朝散郎常安民管勾成都府玉局
觀朝奉大夫孔平仲管勾兗州太極觀王翬管勾江州
太平觀張保源監華州西嶽廟朝奉大夫陳鄂管勾杭
州洞霄宮朝散郎朱光裔管勾建昌軍仙都觀蘇嘉管
勾華州靈臺觀余卞監西京中嶽廟鄭俠監渾州衡山
南嶽廟胡田管勾建昌軍仙都觀遂州觀察使孟存提
西京嵩山崇福宮承議郎知沂州劉安世依前承議郎
提舉西京嵩山崇福宮知金州范純粹管勾南京鴻慶
宮鄂州居住集賢殿修撰知應天府呂仲甫落職追復
寶文閣待制吳安時落職事因二十八日鹿敏求追

所授承事郎降充簿尉呂彥祖追所授官永不得應舉
高士育追所授官依舊左班殿直何大正追所賜出身
及所授官永不得應舉以言者論其獻書得官所言無
補志在僥倖故也 九月九日前知荆南府馬城追三
官勒停海州安置以徭賊入寇不即聞御史臺具獄上
故責之